

1210

307.16
57
1218

淞濱實驗錄

何健署簽



泚濱寶驗錄

閑心翁題



淞濱實驗錄序

利人濟世之學中西醫尚矣然中醫方以空洞虛玄
為時詬病膚淺之徒且欲毀之而代以所謂西醫云者
則中醫之厄方深也長沙朱保之先生世精於醫
其懸壺海上也聲名藉藉病者恃以無憂近輯其
在滬治症方案曰淞濱實驗錄問序於余是真
能以實證理可謂不蹈虛者也倘習是術者胥屏
空洞虛玄之說而惟實是務則國醫之光磨而益

爛岐黃仲聖之學當遠駕西人之上雖然以空見
識非獨醫學也孔子之道固亦有之世有君子闡明
而力行焉將祛心性之疾而登一世於春臺其功則
偉矣余覽斯編不禁戚之於中朱君以利濟為心
者其將有感於斯文民國二十五年一月何鍵



余少年十有五先君子遭偏對口瘍疾侍醫藥百餘日輒
從醫者稍識方書以爲人子事親之道固不可不知醫也
及長偏覽內難金匱傷寒諸經論然以不遇碩師淺嘗薄
涉乃復棄去夫醫雖小道在中土則本出於聖帝而海外
近二百年來則其格致名家苦心焦思僅得其萬一者也
元王好古名所著書曰此事難知不其然哉朱君保之世
爲儒而知醫一日出淞濱實驗錄自序示余雖未見其本
著然觀其述祖德敘淵源則孝子仁人之用心也明矣余
兒時嘗從先君子游絲茅衝拜見雨田公龐眉長項若神
仙然心竊敬異今誦保之之文益信雨田公別有養生之
術而服保之能繼厥志爲不可及也謹爲之序云世愚弟

曹典球拜撰

粵自神農始嘗百草軒轅迺著內經醫學之發明尙矣既而春秋之和緩漢之扁倉見於經紀於史是能窺藏結察腠理而醫者所竊竊望焉而不可及者也夫針石刀圭法創自昔後世術稍稍衰西人取而明之我反詫爲神奇習焉不察輒乞靈於西醫不知醫之理微體氣之不能強同南北且然況中外乎盲從者至喪其形而不悔噫不亦可閔也乎雖然近世以來醫學不昌習其伎者不暇深求汲汲問世斷送人之生命者又豈少也哉且夫醫之爲術關於人之死生存亡是非極深研幾而又臨診既多烏可輕於嘗試語有之不爲良相卽爲良醫誠以良醫之救人猶良相之救世也朱君應徵長沙人也先世精醫自高祖始

蓋已四世禮云醫不三世不服其藥以朱君之世攷之可
服其藥無疑近歲朱君賓萌上海治驗方案至二百有奇
爰著於編名曰淞濱實驗錄朱君本其先世之術能自神
其用用輒驗不自祕而公之於世不第操術也精而又宅
心也厚嗟乎如朱君者殆所謂仁人也矣歲次乙亥仲冬
之月應堂夏紹庭拜序於上海市國醫分館

大匠與人規矩而不能與人以巧醫之規矩神農本經黃
帝素問張機卒病論尙已而後之王肅外臺王貺指迷以
及劉李朱張柯喻葉吳之專集論者或指爲偏見或薄爲
時方自尊自傲者更掉首不顧顧烏知各本其規矩而默
運以巧惟有心人能獲其微耳余行醫三十載不願門生
子弟之拘於一家言亦不願愛古而薄今人臨症處方隨
機應變孫真人所云隨時增損物無定方洵座右銘也朱
君目園精醫工詞翰與余交有年輒以此相勗勉今余與
君俱皤皤老矣君且將倦遊歸隱出淞濱實驗錄一卷見
示曰此近歲旅申驗案撮有成效者二百將貽同道參究
君知之深其爲我序之噫嘻舉世滔滔食古而不化者有

之迷新而忘本者有之不學而無術者亦有之以朱君積學之士融會古今而欲使天下盡悟其道寓改進於平淡之中其有不興曲高和寡之歎者幾希更安得有心人以獲其微哉竊感中醫之大病在知之而不肯言言之而不肯詳詳之而不肯公諸世遂使學術無進展而後來者反有奪主之勢朱君以四世承醫令德雨田先生曩創樂全醫館以陶鑄人才今君復刊此書以振發瞶聵其仁者之心靄然可見豈特憂道而已道之存亡吾儕之責君身雖隱名當益彰可操左券焉因綴數言藉誌景仰並以贈別云乙亥歲暮渭川顧夢熊拜序於上海市國醫分館

中國醫學分學說驗案兩派學說起自黃帝內經以迄今
日或作或述層出不窮驗案起于太史公之倉公傳其後
賡續繼起雖不如學說之富而近日中西競爭學說反爲
所攻擊而對于驗案雖狂妄如余巖亦不敢加以訾議誠
以學說屬于理想難以證實而驗案則事實所在不可憑
空詆毀者不知事實必根據學說不有正當之學說安有
真確之事實况醫之臨牀診治萬不能不根據學說以爲
考察乎朱君目園之淞濱實驗錄亦驗案之一派也君爲
閣學雨田先生之孫觀察鄂生先生之子詩禮簪纓久推
望族君既能世其業君之夫人爲張文達野秋先生愛女
又擅詩詞一門唱和爲湘人所豔稱君之學既得之庭訓

其醫亦本于家傳記曰醫不三世不服其藥君之醫學既不止三世而又皆爲儒醫則其學之深邃而大異于流俗可斷言矣顧君雖湘中世家而以世變居海上時多故其臨牀之成績亦多在淞濱今者將有淞濱實驗錄之刊行乞序于余此書之出又可爲後學增一良好導師何也由其詩文推之而可信其實驗之成績必斐然可觀也雖然竊有爲君進一解者自歐化東漸舉國若狂中國固有之文化國粹勢將掃蕩淨盡而數千年來聖哲明達發揚光大之中醫學說亦摧殘而幾不能自存其喪心病狂受外人之運動從學說之根本以推翻中醫者無論矣其平日著書立說負海內盛名如張氏山雷對于奇經八脉及十

二經絡亦復不能堅信至于以傷寒暑病歸之物理其立
言亦似有理然細按之則亦心目俱盲而已吾輩旣丁此
時卽應力任中流砥柱萬不可隨波逐流自喪其我故僕
年來孤行其意受任何之侮辱攻擊均未嘗爲之少屈此
則耿耿之心願與君共勉之者也嗟乎披髮祭野知百年
而爲戎今日之用夷變夏豈僅披髮祭野已哉順今之潮
流非由歐化以趨獸化不可二三耆舊如不能擔當斯文
將喪之責則兩間之正氣非日就消滅不可醫其小焉者
也來日大難人間何世因朱君之書感慨及之知我罪我
一聽之國人而已大中華民國二十五年一月雪山老衲
曾覺叟序

曩在庚辛之交嶽崙獲識先生於國醫公會邂逅相遇末
由把臂傾談心竊嚮往之本年出席中央國醫館理事會
側聞先生懸壺海上聲施爛然因迂道至滬將往訪焉適
以校務電促倉皇遄歸致成參商人生相見之難固如是
乎日昨先生忽枉駕過訪并出其所著淞濱實驗錄見示
嶽崙受而讀之指陳病機批卻導窾判然若扁鵲之眎齊
桓侯病不爽微芒信乎其學其識誠有大過人者夫靈素
簡奧非易探尋而傷寒雜病論本仲聖治驗之書然有法
無案亦非淺識所能窺及逮宋許叔微始有醫案張杲則
有醫說明汪穉輯有名醫彙案清魏之琇續之萃然成爲
巨帙大都皆裒集前賢之治驗其中附會支離在所難免

實驗與否胥置勿論孰若先生每臨一證息心靜氣曲證旁參務有以究乎病情之真然後依法成方無不桴鼓立應是書在癸酉以前精心結撰識力獨超實爲傑出近時海上諸案出奇制勝變化無端惟以診視紛紜未暇一一精覈茲擇其輒有實驗自信而足以見信於人者著之於編其稍涉疑似者概付闕如洵後學之津梁醫林之寶筏也先生先世皆邃於醫先正禹田閣學善醫多能佐曾文正規復鹽政自主湘岸歲銷恒逾引額接濟饒糴俾成東南底定之功文正薨閣學承建湖南專祠而於其旁爲思賢講舍又於棠坡絲茅衝等處創設樂全醫校湘中耆宿名醫多出其中又督諸子精研醫學暇則自施診治全活

無算嶽崙少時游學思賢曾親炙其光儀不禁肅然敬仰
繼世得壽九鄂生喬生菊尊諸先生丈名位雖顯無不以
施醫爲職志再傳復得先生淹博宏通有名滬海禮曰醫
不三世不服其藥今先生醫已四世矣宜乎令聞廣譽而
著述自足千秋也抑又聞之先生不但工醫且擅詞翰其
夫人爲清尙書張文達之次女尤善唱酬存稿頗多嶽崙
嘗讀其閑與軒遺集與先生之盪瀾縑詞鈔纏綿悱惻至
性動人仁術仁心於茲益見是書之作特先生一端之緒
餘耳今先王還湘行將以施諸滬上者惠及桑梓併將是
書壽諸棗梨俾公同好其利賴豈有窮哉嶽崙不敏勉贅
數語於端以質世之善讀是書者時